

Comentario

Den memoria di Juby Naar

Skirbi pa: Mercedes Monge

Mas of menos un ora pasa, noticia a drenta cu nos (ex) colega señor Juby Naar a bay sosega den paz di Señor faltando djis algun siman prome cu e lo a cumpli 81 año di edad. El a fayece na Hospice.

Juby Naar tabata un pilar den diferente tereno, sigur multifacetico. Den medio di comunicacion el a traha den radio, television y ta un di e pioneronan principal di DIARIO. Manera tur hende sa e tabata un di e motornan di Aruba su carnaval, y pa añanan largo e tabata tin su columna carnavalesco "Popo", por cierto hopi popular mes. Tambe, conoci como un gran actor di teatro, como mentor di diferente actor y actriz hoben, y hopi biaha el a presenta den Cas di Cultura. Un defensor fuerte di Aruba su Papiamento, y hopi critico cu e manera cu diferente hende tabata skirbi'e y mi ta corda cla cla, con e tabata coregi mi articulonnan ora mi a cuminsa traha como parti di redaccion di DIARIO. Mi a yega di haya zundra di dje, ora mi tabata ripiti un fout di skirbimento, cu ya caba el a coregi mi un dos biaha caba. Algo cu el a aprecia ta cu pa mi cay bek den fout, mi a cuminsa skirbi den un "notebook" tur e palabranan y maneranan di skirbi na un miho Papiamento, cu mi tabata consulta cada bez pa tempo largo, te ora el a stop di coregi mi, y cu el a bisa mi cu ya mi tabata domina e idioma basta bon.



Juby tabata tin un column a critico basta skerpi, cu e tabata firma como Hucona, y manera un dicho popular na Aruba ta bisa "berdad ta pica lenga" e tabata haya elogio y tambe desacuerdonan segun e tema, segun e caso.

Semper mi a gradici'e pa tur loke mi a siña di dje y mi tabata bis'e tambe. Juby tabata gusta haci joke tin biaha un tiki pisa, y otronan divertido cu tabata pone mi hari.

E poco biaha a yama mi pa mi nomber. Desde cu mi a cuminsa den DIARIO el a batisami como "La chica Diario". Dia cu el a retira di DIARIO mi a haya un sensacion straño, vooral ora el a hinca su archivonan den un caha, y su cosnan personal. El a regala mi nieta cu ta stima futbol algun documento historico di futbolistanan famoso di Aruba y di exterior. Mi ta corda dia cu el a bay full y a bisa mi "awo si, chica Diario, mi no ta bin mas" y a duna mi su braza di despedida. Y di berdad e no a bishita nos mas. Algun biaha mi por a papia cu ne na telefon pero despues e no tabata contesta mas.

Mi ta corda tempo cu mi tabata nobo den DIARIO, den un cena di final di año, cu el a bay cu su señora y nan a balia tremendo, pa mi esey tabata loke a atrae mi mas cu nada otro. Su hopi stima Filomena a adelanta Juby den su viahe na eternidad, y awo sigur nan a topa otro pa eternidad. Cu Juby Naar sosega den paz di Señor!

Director di ATIA, Herrick Henriquez:

Asina cu e ley nobo di importacion drenta na vigor mester cuminsa un maneho nobo di tarifa

ORANJESTAD (AAN):

Despues di e pandemia, e economia a crece hopi libe, pero ta bay cuminsa stagna. Asina director di Aruba Trade & Industry Association (ATIA), Herrick Henriquez a duna di conoce.

El a bisa cu si wak e raportnan di Banco Central di Aruba, e 'outlook' ta pa e stagna, pa un crecimiento di 2 %, mientras cu tabata 7 % of mas.

Henriquez a indica tambe cu tin cu bay wak con por lanta esaki bek. Mundialmente ta wak prijsnan ta subi, pero tin cu bay wak e efecto pa ki dia e ley nobo di importacion ta drenta na vigor. Mester a drenta na vigor dia 1 di



Januari, pero e por bira fin di mitad of fin di 2024.

E ora cu tin cu bay cuminsa un maneho pa e tarificanan nobo. Ta cosnan cu tin cu keda analisa y papia riba dje pasobra e unico manera cu prijsnan por baha na Aruba ta awo den man di gobierno, a señala.

Aruba no ta un 'price setter'. Ta un isla cu mester tuma prijs y haci

business, a expresa.

Herrick Henriquez a laga sa cu e miembronan di ATIA a laga sa cu 2023 a bay bon. Pero hopi biaha e placa no ta drenta completo den saco.

Esey ta algo cu ATIA kier bay traha riba dje y sigui pusha pa crece economia, a finalisa bisando.

Temporada di Carnaval ta un temporada druk pa Telefon pa Hubentud


ORANJESTAD (AAN):

Shurman Milliard, Director di Telefon pa Hubentud 131 a remarca cu e temporada di carnaval semper ta uno basta druk pa e fundacion.

Den e temporada aki nan ta pone hopi enfasis riba 'peer pressure'. Ora e muchanan ta bay carnaval nan ta wak otro hendenan baila, actua, bebe y haci cosnan cu normalmente no tur ora nan a wak.

Pesey kier pa e muchanan sa cu nan por para riba nan mesun pia y dicidi pa nan mes como tambe para pa e consecucionan, Milliard a indica.

TelefonpaHubentud banda di esaki tin e charla di norma y balor y esey ta hopi bunita pasobra carnaval ta un temporada bunita y mester



participa na un manera positivo. TPH tambe ta bay papia riba esey den charlanan, na scolnan cu kier participa. Por acercá Telefon pa Hubentud 131 pa asina papia tocante di norma y balor.

Tin 131.aw, esey ta e website di Telefon pa Hubentud. Nan

doelgroep ta mucha y hoben entre 8 y 24 año y nan por yama 131 tur dia den oranan di atardi. Un partner ta Tienda di Educacion unda mama y tata por yama tocante termento of con pa anda cu lantamento di e yiu, Shurman Milliard a indica.